

東
華
續
錄

東華續錄

乾隆九十四

臣王先謙敬編

臣周瀚蕃恭校

秋七月乙巳諭前以甘省收捐監糧一案私收折色冒賑浮銷上下通同舞弊既經發覺不可不徹底查辦因屢傳諭阿桂等嚴切詳查據實參奏今據阿桂等將折收銀兩在省包辦冒銷賑糧種種弊端已全行查出此時即將各省大小官一併革職審究亦皆罪所應得但此事總在藩司爲政其次則首道首府首縣勾通侵蝕爲弊較多此外各道府州縣雖弊實亦皆不免而此時尙未查明毋庸遽行辦理所有前任蘭州府知府蔣全迪前任皋蘭知縣程棟著革職拏交蘭州嚴審此外各員著交吏部查明其曾任蘭州本道首府及首縣者著卽一體革職拏交蘭州審訊其餘各道

府州縣著加恩免其提訊俟該部查明再降諭旨至王廷贊前來行在時令軍機大臣傳旨訊以監糧一案伊堅稱並無情弊後遣令回京候旨又令留京王大臣會同刑部堂官覆訊並傳示硃批諭旨以伊之生死在實供與否令其自定朕不食言乃伊仍止供辦災以少報多以輕報重難保必無而於一切情弊始終不肯供吐今阿桂等業已根究明確弊竇甚多是王廷贊之罪更不能復加寬貸王廷贊著革職拏問解交行在俟王亶望解到時交軍機大臣一併會同行在大學士九卿質訊○諭軍機大臣等據阿桂等奏查出監糧案內種種舞弊情事請將王廷贊秦雄飛福甯等見任官二十一員革職審訊及丁憂事故潘時選等十三員一併革職押解赴審此等積弊至於如此自不可不徹底查辦但人數未免太多且此事起於王亶望繼以王廷贊其他任蘭州本道首

府首縣者斷不能不革職審辦至此外各員如果能將冒賑分肥各款逐一供認據實稟明毫無隱飾尚可仰邀格外之恩如再不實供是怙終不悛必當加倍治罪斷難復邀寬減見已明降諭旨交吏部查明再行分別革職解審傳諭各員原籍及見任地方之督撫傳訊取供據實代奏其見任甘省各員並著照阿桂等所請傳旨仍以原銜辦事將此案情節逐一訊問將朕特恩開其一綫之旨統令據實供吐具奏若再不供吐實情則實罪由自取不能再寬矣所有單開之秦雄飛等亦照阿桂等所請之例此時暫緩開缺如內中果有與王亶望王廷贊等通同舞弊染指之處統俟阿桂等續行查參另降諭旨至另摺請獎之蘇楞泰等俟此案審定後再行酌量請旨補用將此隨報傳諭知之○丁未定京營兵額一萬名分設南北左右四營改圓明園南營爲中營○壬子諭

甘省收捐監糧一事原因邊陲地瘠民貧應令倉儲充裕以備賑恤之用是以復經允行乃開例之始卽公然私收折色甚至通省大小官員聯爲一氣冒賑分肥扶同捏飾積成弊藪旣經敗露自不得不徹底根究見據阿桂等陸續查奏厯年積弊俱已水落石出是竟以朕惠養黎元之政作爲官吏肥橐之資實屬愍不畏法爲天理所不容況辦賑之事有濫必致有遺若官吏多一分侵漁卽災民少受一分實惠朕之所以嚴行窮究者正欲剔除官吏積弊使百姓實受賑恤之益並非因辦賑有弊轉將賑恤之事靳而不與也前恐各督撫誤會此意或致有災不辦曾經明降諭旨宣示中外但恐督撫等仍未能仰體朕懷且不肖之員或以於己無可分肥卽於民視如膜外其所關於民政者甚大朕如傷在抱偶遇各省偏災不惜多發帑金優恤不致一夫失所此天下臣民所

共知共見者各該督撫務皆以愛民恤災使得均沾實惠爲念遇有地方水旱卽詳晰查勘據實具奏加意賑恤斷不可因有甘省監糧之案遂爾因噎廢食以致稍有諱飾儻如此申誠再三而督撫等仍有蹈此者經朕查出必重治其罪將此再行通諭知之○諭軍機大臣等據富勒渾奏報萬錦灘於初二三日長水一丈八尺黑堽於初四五口前後長水一丈二尺五寸八堡池東焦橋一帶漫水過隄趕護不及以致大隄被刷三十餘丈初六日午後水落四丈有餘灘而露出始見圈隄與八堡大壩見飭屬趕作裹頭保護大隄自請交部嚴加議處等語又據韓鏞奏到漫溢情形將道廳營汛疏防各員查明題參並自請嚴加治罪等語此次河水漫溢雖屬洶湧但大溜仍走中路圈隄大壩已露出灘面韓鏞富勒渾聞信後卽親赴該處督率搶護辦理尙屬無過所請嚴加議

處及治罪之處尙可寬免惟見屆秋汛務須加意防護趕緊辦理以期工程鞏固其漫水經過地方有無損傷田禾並著查明照例撫恤毋稍諱飾將此諭令知之仍將見在情形迅速覆奏○阿桂等奏本月初五日帶兵至華林寺牆邊攻撲賊退竄寺屋及圍牆內藏匿我兵焚燒寺基寺簷坍倒斃賊甚多餘竄至後牆及兩廂墻圈內用槍石抵禦初六日我兵至寺後緣牆而上放槍擲石斃賊幾盡有賊百餘從西邊滾下直礮我兵重重圍裹擒殺淨盡無一漏網諭軍機大臣等此次勦捕逆回雖因其死守抗拒遲至三
月有餘始行殲滅誠然使賊於一月前衝突而逃勦捕正自費力今乃占聚華林山寺俾官兵得以全數殲擒竟無一名漏網仰賴
上天嘉佑朕愉快之餘惟益深虔畏耳至阿桂等所稱馬明心家
屬徒弟並伏羌縣斂銀之新教阿渾與各逆黨家屬已委按察使

福甯前往查辦等語所奏甚是此等從逆回民露有形迹證據者
必須全行搜查不可稍存將就了事之見至省城及循化河州等
處監禁逆犯之婦女幼孩人數甚多著阿桂等查明將應發煙瘴
者卽行分別發遣毋令久稽監獄○以馮應榴爲江西布政使由
順遠○癸丑諭軍機大臣等據韓鏞等奏祥符南岸漫溢之處水
已斷流見飭員弁趕緊補築一摺已詳悉批示矣又據奏儀封北
岸曲家樓隄工於初五日夜刻水高於隄一二尺搶護不及刷坍
隄工二十餘丈並未掣溜見在上緊裹頭以免刷寬並親赴北岸
確查等語此次北岸水勢旣據查看已見消落大溜仍走河心酌
量情形大槩與南岸焦橋漫溢相同著傳諭韓鏞等速行督飭廳
營員弁上緊趕築以期迅速集事並將見在飭勘水勢曾否已經
斷流及有無傷損民田廬舍之處迅速據實具奏所有北岸漫工

請交部治罪之處著加恩寬免○以錢士雲爲兵部右侍郎

由內閣學

遷

○閩浙總督陳輝祖畧福建巡撫楊魁奏老鹽倉一帶海塘自

場字號至名字號一千五百丈改建石工其立字號至因字號二

百丈相傳沙性汕澀不能釘椿臣等駐工籤試經打椿一丈二三

尺不復搖動請一律改築鱗塘石工得旨如所議行○丙辰山西

巡撫雅德奏本月初三日子時永濟縣黃水漫衍淹及城身辰刻

方退城北沿河五十餘村被淹調員分給口糧酌借籽種得旨知

道了目今民情安妥究未成災否○丁巳諭回部郡王品級貝勒

霍集斯之爵例應降襲但念其住京以來行走奮勉今伊病故未

忍遽子降等仍著其子哈第爾承襲郡王品級貝勒○諭軍機大

臣等據農起題報歛縣故民黃全寶之妻吳氏因姑逼嫁投塘身

死一本已批交該部議矣此案黃吳氏自伊夫故後賣衣葬夫

養姑克守婦道乃伊姑黃江氏貪圖財禮欲逼改嫁以致吳氏聞知赴墳哭別投塘身死是黃江氏與吳氏姑媳恩義已絕若仍照例收贖杖罪殊未允協著傳諭刑部堂官議覆時黃江氏不准納贖按律的決以歸平允○定各省武舉效力年滿考驗後分補千總把總例○已未定武職遊擊以下記名限年升用例○庚申諭軍機大臣等據巴延三等奏接巡羅國鄭昭具稟求貢詞意頗爲恭順惟請給執照前往廈門甯波等處夥販未敢擅便至所稱貢外之貢與例不符及備送禮部督撫各衙門禮物並餽送行商及請將餘貨發行變價以作盤費槩發原船帶回求買銅器例禁出洋不敢率行奏請並擬覆稟諭飭一摺已於摺內批示外國輸忱獻納自應准其朝貢以示懷柔俟該國貢使齋到貢物表文時巴延三等派委委員伴送來京呈進後再降諭旨其備送各衙門禮

物有乖體制求買銅器例禁出洋自應飭駁至所請欲往廈門甯波夥販並欲令行商代覓夥長往販日本之處該國在外洋與各國通商交易其販至內地如廣東等處貿易原所不禁至販往閩浙別省及往販日本令行商代覓夥長則斷乎不可該督等所擬檄稟駁飭尙未周到見令軍機大臣另行改定發往諭以本部堂接來稟據稱暹羅歷代供貢自遭緬匪之後紹裔無人以致貢疏茲羣吏眾庶推爾爲長依例備貢恭進等因具見小心恭順出自至誠本部堂已據情代奏如蒙 大皇帝鑒爾悃忱加恩格外准爾入貢俟本部堂差員伴送爾國陪臣敬齋入都朝覲至另稟外備蘇木象牙等物爲貢外之貢 天朝撫綏萬國一應朝貢多寡均有定制豈容任意加增難以代奏至致送禮部督撫各衙門禮物甚至餽及行商並求准買銅器千餘箇先放空船回國等語更

屬瑣鄙不知事體

天朝綱紀肅清大法小廉內外臣工豈有私行收受爾國物件之理銅斤例禁出洋更不便准爾採買若本部堂據情代奏轉滋爾忘分妄干之咎用是明白曉諭將貢外之貢及呈送各衙門禮物發交原船帶回又爾稟後附請給照載貨前往廈門甯波等處並欲令行商代覓夥長往販日本等語尤屬不知禮體爾等在外洋與日本各國販買交易原所不禁若欲請官爲給照及令行商覓夥往販日本則斷乎不可本部堂亦不敢代爲具奏至爾國所請餘貨在廣發行變價一節此向來交易之常應聽爾等自行覓商售賣亦不必官爲經理至所稱餘貨變價以作來使盤纏等語向來各國陪臣進貢入境之後一切往來費用天朝自有例給口糧無庸買貨支應爾國甫求入貢輒以貿易牟利細事稟請准行甚非表爾效命歸誠之意本部堂念爾遠在

外夷不諳禮法亦不加責備是以剴切曉諭此後務宜益勵敬恭
恪守臣節毋得輕有干瀆交巴延三照此檄知至該國在廣販買
貨物若亦令原船帶回未免徒勞往返無利可得殊非體恤遠人
之意此項貨物自應聽其在廣私行交易亦不必官爲經理在該
國僻處遐方何以知廈門甯波等處可以夥販及行商覓夥往販
日本查閱稟內開載商船澄海新會縣各字號俱係內地此必係
船戶等憑憑該國翼圖夥販牟利不可不嚴行查飭著巴延三等
卽委幹員將該船戶等傳詢緣由嚴行戒飭據實覆奏○辛酉命
阿桂查閱河南山東河工○甲子命江蘇截留漕糧十萬石於崇
明縣備賑○乙丑諭福康安奏南掌國備帶餘象懇求賞給礮位
酌請將象隻發回一摺所見是已於摺內批示惟所擬檄稟內尙
有未能周到之處已諭令軍機大臣增改進呈發往遵照諭以該

國遠居邊外爾先王傾誠向化始通職貢數十年以來極爲恭順
茲以例貢屆期該國王感荷大皇帝恩德遵守父兄訓教敬遣使
臣奉表恭進並於例貢馴象二隻之外另具慶祝 大皇帝萬壽
表文加貢馴象二隻見據雲南沿邊地方文武官稟報業已入境
足見爾國之尊奉 天朝恪敬肫誠允堪嘉尚本部堂當爲據情
轉奏此外另有該國王咨呈本部堂公文一件內稱該國被交趾
等處劫掠因無抵敵器具是以於貢象外又備象一隻懇求本部
堂轉奏 大皇帝賞給礮位匠役並馬騾驢羊等物前來仰惟
大皇帝撫馭中外一視同仁向來賞賚屬國隨其臣服小心靡不
從優頒賜原亦無待懇求至礮位乃攻戰器具從無給與外藩之
例况交趾與爾國同係 天朝屬國設使交趾因與爾國交爭懇
賞礮位 天朝豈肯允准給與資其攻闢之具乎該國王與交趾

自應共矢恭順各守疆界和協鄰封仰體 大皇帝好生之德愛養百姓保固疆宇自不至有爭鬪之事若不遵 天朝德教殘暴民人勢必見輕於鄰邦自取陵侮雖有礮位無足恃也本部堂特以正理告爾國王所有懇賞礮位匠役之處未便據情代奏咨呈禮部公文一角亦不便爲轉達仍行寄還至象隻爾國視爲難得天朝本不缺少所進貢象四隻仍係向來例之所有者當爲爾國解送京師奏明 大皇帝以見爾國王之恭順其另備餘象一隻卽交先行遣回之先目人等帶回該國仍令地方官及沿邊土司人等照料出境該國卽可收明至使臣帶來致送本部堂牙錦等物備承國王厚意卽與收受無異仍俱璧還亦交先行遣回之先目等帶回該國既需馬騾驢羊等物本部堂仰體 大皇帝懷柔至意於向例之外酌量加增俟使臣事竣回國時給與帶往爾

國王尙其畏威懷德愈勵盡忱綏靖邊黎以期永受大皇帝怙
冒深仁常守屏藩之任本部堂職任封圻亦有厚幸交福康安照
此檄知至另片所稱查詢該國王準第駕公滿物故是以伊弟召
翁列名具稟之處此係外夷承替兄終弟及之常既據查明聽其
自然可也將此並諭福康安知之○丙寅諭軍機大臣等據文綬
奏覆前後拏獲咽喉匪審辦一摺內稱川省無藉游民搶劫歷年拏
獲拒捕傷人等案隨時題奏辦理近以梁山墊江等縣各報有搶
劫刃傷事主鄉保之案嚴飭各屬盡力查拏獲胡範年等五十一
名已正法者九名該匪等聞風竄匿逃往合州太平縣並竄入湖
北黔省仍復逃回八九十人見在四處截捕續獲二十一名又追
至廣安殺斃八名生擒十七名餘黨俱卽逃散等語所奏甚屬糊
塗已於摺內詳悉批示矣此等匪犯文綬既經拏獲卽當嚴審辦

理一面正法一面錄取各犯供詞詳悉奏聞乃文綬前此奏到摺內止稱將見獲各犯從重定擬速正典刑並未錄供具奏而本日摺內又稱將首犯胡範年等九名先行正法等語其如何訊取供詞各犯如何搶劫拒捕共有幾年在何處地方何時審明正法之處究無一語敘及文綬久任督撫所辦何事不應糊塗至此況匪徒聚集川省該督果能隨時嚴飭文武各員實力擒捕四處派員堵截於邊界有防何至逃逸別省乃文綬平日漫不經心一任地方官疏縱釀成致該匪等蹤迹往來如入無人之境其所爲邊防者何在及匪徒竄入湖廣貴州等省結黨成羣搶掠滋事該督仍復安坐省城並不於要隘處所親往督率查辦乃此次摺內尙覩顏稱經鄂黔等省官兵截拏仍復竄回等語一似置身局外者然文綬於此事不是甚大伊豈欲學勒爾謹乎文綬辦理此案種種

錯謬不可枚舉著傳旨嚴行申飭至指內所稱匪犯由川東夔江一帶逃回續經兩次拏獲三十八名著卽審明遵照前旨分別應正法者卽行正法卽逼勒同行並未拒捕之犯亦應發伊犁給厄魯特爲奴務卽速行辦理奏聞其逃散各犯並著該督飭屬擒捕毋使一名漏網其見在已經正法及拏獲審訊各犯均著詳悉錄取確供迅速馳奏再提督李國梁前經降旨派令帶兵三百名徑赴川省會同該督設法按捕此時想已到川境如該處咽喉匪業經捕獲淨盡無庸李國梁在彼帶兵督辦亦卽一面奏聞一面令其將所帶楚兵先行撤回此處在文綬相度機宜酌量辦理至此事文綬旣因循貽誤於前不可不實力懲創於後此番拏獲淨盡之後若川省復有咽喉滋事無論人數多寡必須飭令地方文武設立章程隨時查辦毋致該匪等復滋萌孽並著於年終彙奏一次

將此傳諭文綬並諭李國梁知之○庚午諭行在大學士九卿會
審勒爾謹王亶望王廷贊等捏災冒賑侵蝕監糧通同舞弊營私
各款按律定擬請旨卽行正法一摺朕酌覈三人情罪卽予駢誅
亦所應得但其中稍有區別有不得不爲明白宣示者甘省例捐
監生本欲藉監糧爲備荒賑恤之用乾隆三十九年經勒爾謹奏
聞開例議准允行原令止收本色糧米其時王亶望爲藩司卽公
然私收折色銀兩勒爾謹竟如木偶毫無見聞於是王亶望又倚
任蘭州府知府蔣全迪將通省各屬災賑歷年捏開分數以爲侵
冒監糧之地自此上下句通一氣甚至將被災分數酌定輕重令
州縣分報冊銷上侵國帑下屯民膏毫無忌憚嗣後王廷贊接任
藩司旣知折色之弊雖稟商該督欲請停捐乃仍復因循觀望並
不據實陳奏且將私收折色一事議定改歸首府辦理而一切弊

竇仍未革除若非朕特降諭旨令阿桂等密行查辦則始終蒙蔽王賈望諸人竟得安然飽其慾壑倖逃法網有是理乎今王賈望勒爾謹王廷贊等拏解行在審勘所有伊等冒賑分肥婪贓舞弊各款俱一一供認明確俯首無辭夫國家任用總督藩司本欲令其糾察屬吏遇有積弊病民之官隨時舉劾俾民瘼得以上陳而恩膏得以下逮朕臨御四十餘年以來無日不以敬天勤民爲心凡各直省偶遇偏災卽飭地方大吏加意撫綏降旨賑恤此中外臣民所共知共見者卽查辦此案朕早有風聞猶恐各督撫或誤會朕意因噎廢食致將災賑之事靳固不舉是以遲回未發者已二三年矣今諸弊已露若再不辦是朕不能懲貪察吏朕豈肯受此從前恆文方世儒良卿高積錢度等俱以婪贓枉法先後伏誅然尙未至侵蝕災糧冒銷國帑至數十萬金如王賈望之明日

張膽肆行無忌者王亶望由知縣經朕加恩用至藩司巡撫乃敢負恩喪心至此自應卽正典刑以彰國憲王亶望著卽處斬至勒爾謹本一庸懦無能之人因其平日尙屬小心勤慎用爲總督從前逆回一事原因勒爾謹養癰貽患所致卽收復河州亦係布政司福崧在彼籌畫幫同辦理勒爾謹失機貽誤本卽應正法彼時朕尙從寬改爲監候今又於王亶望私收折色冒賑婪贓一案全無覺察而已亦受收屬員代辦物件一任家人等從中影射侵肥種種昏庸貽誤罪更難追但朕究以用人不當自引爲愧未肯卽令肆市勒爾謹著加恩賜令其自盡至王廷贊以微末之員擢至藩司受恩深重乃於接任王亶望交代時不惟不據實參奏且效尤作弊雖未收受屬員銀兩亦有派買物件並加收心紅紙張銀兩之事其罪亦難末減况從前令留京辦事王大臣及刑部堂官

審訊時令其將此案冒賑私收及王亶望婪贓等款詳悉供吐並
硃批傳諭王廷贊伊之生死總在此番實供與否令伊自定朕不
食言乃竟始終匿飾不吐實情豈非自取其死但究念蘭州守城
微勞免其立決王廷贊著加恩改爲應絞監候秋後處決交刑部
按例趕入秋審朕辦理庶務一秉大公至正此事既經發覺自不
得不徹底查辦嗣後內外大小臣工益當互相砥礪各懷冰淵共
矢愛民潔己之誠毋蹈簠簋不飭之戒所有辦理此案情節著通
行曉諭中外知之○是月阿桂奏臣奉 硃批近來辦事更覺老
練精神亦好但恐不似往年於木蘭騎馬上圍爲慚耳臣惟秋獮
肄武國典攸關 聖祖仁皇帝英武蓋世六旬外進哨卽乘便轎
今歲 聖壽已過七旬若仍騎馬上圍未免勞動非頤養所宜得
旨知道了待入圍時朕自酌量耳 家法肄武所以柔遠然亦不

至勞身以廢政務也

八月甲戌諭甘省大小各員將災賑監糧侵吞舞弊上下聯爲一氣茲阿桂等在甘查辦其積弊始得盡破見在阿桂等屢次查奏俱已得實朕向有句云不爲己甚去己甚今甘省積弊竟至己甚不可因罰不及眾仍存姑息朕實無可如何矣所有捏報各道府直隸州知州內除按察使福甯首先供出且經手事件較多暫行留任外其見任甘省道員奎明文德王曾翼永齡四員見任甘省各知府及署任知府宗開煌彭永年彭時清鍾廣起汪皋鶴張金城興李本枏又見任甘省直隸州及署任知州侯作吳黎珠趙明旭興德謝桓宋學醇董熙勵學沂侯簡放分發人員到省卽著阿桂等傳旨將該員等一併革職歸案審辦其已離甘省各員見任盟運使程國表原任布政使福明安見任道員觀祿前任甘肅知

府及見任知府潘時選黃元圯周人傑諾明阿富斌德明郭昌泰
觀亮前任甘省直隸州知州及署知州傅赫彥方奇明姜興周朱
蘭王汝地各員又在京供認捏災冒賑及餽送王亶望銀兩之前
任武威縣知縣朱家慶一員俱革職交留京辦事王大臣及任所
原籍各督撫將各該員提訊錄取確供具奏○乙亥諭據李侍堯
奏清釐各州縣應解藩司錢糧其已徵未解尙有五十餘萬兩拖
欠見在嚴催報解以期積款全清等語錢糧徵解出入雖係藩司
專責但勒爾謹身係總督所屬州縣虧短庫款平日豈無見聞且
該督年終彙奏盤查藩庫無虧亦僅以虛言塞責其欺飾之罪尤
難輕貸又李侍堯奏提標派管馬廠遊擊佛津泰等於乾隆四
十四年變價營馬至二千餘匹之多非變少報多卽馬匹本有虧
缺藉以掩飾請將該員等革審一摺通省綠營馬匹關繫差操豈

可以任劣弁虧缺捏報藉端開銷勒爾謹統轄全省營務竟無覺察乃任其虧缺捏報匿不上聞直至李侍堯此時始行查出勒爾謹久任甘省總督一切政務廢弛視同膜外卽曰庸懦無能亦未有若此之漠不關心形如木偶者使勒爾謹尙在自當卽予斬決方足以蔽厥辜今已邀寬典賜令自盡而伊子豈可復令其脫然事外乎著將伊子候補郎中伊凌阿革去職銜同次子一併發往伊犁交與伊勒圖嚴行管束令其自備資斧充當苦差以爲滿洲大員貽誤封疆者戒將此通諭中外知之○吏部議奏四川總督文綬並不實力擒捕咽匪請降調查文綬有革職留任之案無級可降應革任得旨文綬於此案始終玩縱種種貽誤非尋常疏縱僅予革職留任者可比文綬著照李侍堯富勒渾之例賞給三品頂帶從寬留任仍註冊以爲不事事者戒○戊寅吏部等部議奏

王直望之子捐納員外郎王裘捐納主事王榮王焯請革去職銜
得旨王直望之子王裘王榮王焯僅革去職銜不足蔽辜著照勒
爾謹之子伊凌阿等之例俱發往伊犁交伊勒圖嚴行管束自備
資斧充當苦差○壬午論文綬於辦理咽喉一案平日並不督率
文武各屬實力緝捕隨時嚴辦以致養癰貽害肆行不法竄入鄰
境屢經傳旨嚴行申飭並交部嚴加議處從寬降爲三品頂帶留
任令其督率自效茲據周煌奏川省咽喉近年每邑俱多至百十
餘人常川騷擾並有棚頭名號戴頂坐轎乘馬白晝搶奪淫兇如
入無人之境通省官吏罔聞兵民不問甚至州縣吏役身充咽喉
如大竹縣役之子有號一隻虎者囑匪肆行不法亦匪一日朕覽
此奏甚爲駭異文綬身任總督有年乃漫不經心致令賊匪公然
無忌至於如此若不及早嚴辦將來黨與日多安知不又釀成蘇
東革續錄

四十三之事如勒爾謹耶此事若交文綬辦理伊不過仍行諱飾姑息仍致養癰文綬著革任發往伊犁令其自備資斧效力贖罪四川總督員缺著福康安調補其雲貴總督員缺著富綱補授富綱未到任之前著劉秉恬署理楊魁卽著署福建巡撫督撫等身任封疆戢暴安良是其專責乃文綬於咽喉一案因循貽誤至於此極不得不急爲整頓嚴示懲儆至周煌以本省之人奏本省之事如挾嫌虛誣或欲示威地方官則斷難逃洞鑒必治其罪今所奏屬實故將文綬罷黜然未至釀成事端若甘省之勒爾謹斯在文綬尙爲厚幸朕於內外大小諸臣進退黜陟一秉至公何嘗不欲久用其人故屢致革任而留之者如高晉等其爲過可恕也若至不可恕則朕亦無可如何此用人之苦衷也各督撫等其各實心實力整飭地方不可因迴護處分一味姑容自貽伊戚以副朕

簡任之至意將此通諭中外知之○乙酉諭朝廷設兵衛民簡覈軍實期於行伍整齊兵額充足如兵丁等紅白事件從前設有生息惠濟銀兩以資賞卹後因生息名色有關國體特飭停止昨據阿桂等奏陝西添兵案內籌及賞卹聲請酌復惠濟銀兩朕以國家賞兵之費藉商生息支給究屬非宜已傳諭阿桂等令其動用正項開銷矣茲袁守侗海祿前赴行在令軍機大臣傳諭詢問直隸雲南賞兵銀兩支銷款項據稱直隸裁扣公糧銀一萬六千餘兩以備賞用等語看來各省大都如此兵丁紅白銀兩原係加惠營伍格外施恩若因此裁扣名糧致兵額不足殊非覈實營伍之道況今戶部帑項豐盈各省藩庫積存充裕卽見在京營添兵四千九百餘名其馬步糧餉合之各省兵丁賞卹紅白銀兩約算歲支不及百萬國家何靳此費不令開銷正帑而各省乃紛紛裁扣

名糧又且請復生息甚無謂也朕臨御四十六年以來惟事事以敬天勤民爲念凡三次普免天下地丁錢糧兩次普蠲各省漕糧以及遇災卽賑總計何啻萬萬又並未加增賦稅仰荷上蒼嘉佑開拓邊陲府藏殷實國用充饒朕又豈肯稍存靳惜致令有司開聚斂剋扣之端乎所有各省營伍賞卹兵丁紅白銀兩自乾隆四十七年始俱著於正項支給造冊報部覈銷至各省提鎮以下武職員弁俱有應得坐糧馬乾等項前於六月內業經降旨通諭各省督撫將各該省武職所得公項逐一查明覆奏俟奏報到齊令軍機大臣會同該部覈辦照文員之例議給養廉其所扣兵餉卽可挑補實額覈計添給養廉歲支亦不及二百萬兩官員旣無拮据而各省又增添兵力於營伍大有裨益朕御極之初戶部庫項不過三千萬兩今已增至七千餘萬復有何不足而不加惠

天下散財以得民乎所有辦理添兵補額紅白賞卹銀兩及裁添名糧養廉緣由明晰曉諭中外知之○丙戌 上自避暑山莊巡幸木蘭行圍○魏家莊漫工合龍○戊子諭據吳玉綸條奏甘省自三十九年以後報捐監生每名令其補繳銀六十兩所見甚小王賈望等私收折色一案朕本不欲辦恐各省因此諱災今種種弊端水落石出伊等於光天化日之下竟敢明目張膽網利鬻官致朕不得不辦朕之苦衷天下後世共見之然侵漁各員已將伊等平日私收冒銷婪得贓私查抄入官足抵該省浮開冒賑之數若又令各捐生紛紛補繳是轉開鎔銖較利之端於國家政體甚有關繫朕不爲也吳玉綸此奏不准行至該生等明知折色違禁乃相率報捐亦不可不示懲儆所有乾隆三十九年甘省開捐以後報捐監生者停其鄉試三科已經中式舉人者停其會試三科

其加捐職官見任者罰俸三年捐納職官未經銓選者俟到班三年後方准銓選其在各館充當膳錄者著五年期滿後在館效力三年俱以奉旨之日爲始查明扣算其止捐監生頂帶榮身者著加恩毋庸查辦○諭甘省收捐監糧一事地方官私收折色任意侵欺捏災冒賑釀成不得不辦之大案實非朕所喜也且各省偶遇災歉皆動正項賑恤何獨於甘省賴捐監爲乎此後甘省捐監一事竟宜停止將此通諭中外知之○諭內務府漢軍官員丁憂服闋歸部銓選無庸於百日滿後帶領引見著爲令○諭軍機大臣等甘省私收折色一案飭法營私弊端百出見已將首先倡議侵冒分肥之勒爾謹王直望蔣全迪等俱分別明正典刑矣至此案大小各員勾通侵蝕自應按律定擬以彰國憲而儆貪婪但人數較多若槩予駢誅朕心有所不忍自當覈其贓私之多寡以別

情罪之重輕著傳諭阿桂等將各該犯所有侵冒銀款其在二萬兩以上者俱當問擬斬決二萬兩以下者問擬斬候入於情實一萬兩以下各犯亦應問擬斬候請旨定奪並開繕清單進呈所有應行定擬案犯俱著趕本年句到以前具奏毋致延緩○乙未諭前因王亶望於捏災冒賑一案業已明正典刑並將伊子發往伊犁自備資斧充當苦差茲據雅德查奏王亶望之子共十一人長子王裘業經刑部辦理其次王榮王焯見在趕飭起解此外尙有子八人王祐王紳王晉王越王瑤王鈺王庚官王海官俱年在六歲以下等語此案重犯將伊子發往伊犁自屬罪所應得但念其年尙幼小若卽行發遣朕心尙有不忍著加恩將王祐等八人交雅德嚴行管束待年至十二歲時再行遵照前旨陸續發遣伊犁如雅德離任山西卽著交代接任之人遵照辦理

九月庚子朔諭甘肅捏災冒賑侵吞監糧一案自乾隆三十九年以後通省各官聯爲一氣明分公帑經大學士公阿桂等在甘查辦節次訊錄確供奏請將該員等革職拏問並請將任所原籍貲財一併查封以抵官項業經降旨允行此案自王亶望蔣全迪等首先倡率以致闔省效尤通同弊混各州縣亦視侵冒官項爲故常竟無一人潔己奉公庸中佼佼者此而不治以廉弊吏之謂何今旣查辦確實不得以罰不及眾竟置不問朕前降旨云辦理此案實出於不得已者正謂此也朕旣不能道之以德不得不齊之以刑而無恥之徒方且仍冀其苟免世道人心澆薄至此朕甚愧之見在直省各督撫遵旨將該員家產查封陸續開單具奏但念此事發覺已久其案內人犯前聞王亶望等拏問之信知事已敗露豫爲隱匿寄頓誠不能保其必無而在各督撫查辦此等貪吏

自不敢飢法徇情自干愆咎顧若以查抄嚴密之故或株連拖累有意苛求別生枝節致令外間無識之徒妄滋竊議則各督撫之不能深體朕意也況此等焚得賊私理無久享此時卽有隱藏其子孫亦斷無安坐而食之之理此天誡之昭然不爽者朕之辦理此案權衡審慎止欲使貪黷營私之吏知所炯戒庶可以勵官常而振法紀非真藉錙銖籍沒之貲財抵償官物也所謂不爲己甚去已甚朕之辦理庶務始終期以此意而已將此通諭中外知之

○辛丑諭軍機大臣等巴延三等奏據暹羅國長鄭昭豫備正貢一分具表懇請代奏並備象牙犀角洋錫等物以爲副貢等語該國長輸誠納貢備具方物所有正貢一分自應照例送京收納至所備副貢若槩令齎回致勞往返轉非所以體恤遠人著傳諭巴延三於副貢內止收象牙犀角二項同正貢一併送京交禮部於

照例賞給之外查例加賞以示厚往薄來之意其餘所備貢物准其卽在廣省自行覓商變價並將伊等壓贖貨物均一體免其納稅將此並諭禮部堂官知之○壬寅諭軍機大臣等據薩載奏見在籌辦宣洩情形及勘過運河微山湖東南兩面水色澄清一摺所辦俱合機宜東省猝被黃水漫注民田廬舍聞被淹浸國泰目覩情形急籌疏洩竊意江南爲下游去路其勢不能通暢輒以東水日增鰓鰓過慮且或聽信寮屬之言過於張皇亦並有急於見長之意遂形諸奏願朕前以國泰所奏止在東言東屢經飭諭原不以爲是也今據薩載所奏沂水駱馬湖之水不使涓滴入運爲運河騰空去路又永濟橋孔全行過水並無橫壩攔截使水得以暢消等語所辦俱有條理薩載於河務本爲熟諳其所奏尤屬確實朕之信任國泰自不若薩載也見在薩載會同國泰將下游應

辦諸務面商辦理國泰應聽薩載指授凡事務須籌畫全局不可
稍恃己見庶幾將來議見得以漸次開拓至江南河湖情形國泰
或不能深悉其前奏之未能確切尙屬急公之見朕亦不加深責
國泰惟當無分畛域悉心籌辦不必自生惶惑也再江南山東被
災各州縣該督撫等務須督飭所屬加意撫恤毋使一夫失所以
副朕軫念將此傳諭薩載等並將薩載奏摺及朕硃批一併寄國
泰閱看並遇便諭令阿桂知之○甲辰諭昨據阿桂等奏甘肅收
捐監生歷任正署藩司給發實收俱有加收心紅紙張銀兩達爾
吉善於前署甘肅藩司任內曾給發實收三千九百餘張等語此
案私收監糧折色並加收心紅紙張銀兩該省歷任藩司通同弊
混達爾吉善身係滿洲乃署任內亦復扶同相沿陋例並未據實
陳奏實大不是豈可仍留藩司之任達爾吉善著革任仍加恩賞

給三品頂帶令自備資斧卽赴和闐辦事所有前經派出之成策不必前往其直隸布政使員缺著明興補授○丙午 上駐蹕避暑山莊○丁未諭軍機大臣等甘肅捏災冒賑侵蝕監糧一案見經阿桂等審明將各州縣侵盜錢糧數至二萬以上者問擬斬決其餘按數遞減分別斬候等因見交軍機大臣會同行在大學士九卿並留京辦事王大臣會同大學士九卿科道等覈擬覆奏矣此等冒賑殃民侵吞國帑數至二萬兩以上各犯自應卽正典刑以彰國憲著傳諭阿揚阿卽先行馳驛前往甘肅俟接到明旨後會同李侍堯監視行刑此時當以差往甘肅查辦事件爲名不可先爲洩漏並諭李侍堯知之○戊申諭王廷贊接任甘肅藩司於王亶望通同屬員捏災冒賑一案並不據實參奏及早清釐乃轉踵行其弊仍將監糧私收折色且改歸首府辦理又每名加收心

紅紙張銀一兩並派屬員買辦物件及事已發覺經朕硃筆訓諭令其據實供吐尙敢枝梧狡飾前據行在大學士九卿會審按律問擬斬決本屬罪所應得因念其本年三月蘭州守城微勞姑從寬典改爲應絞監候茲續據阿桂等查奏甘省浮銷賑糧腳價一項王廷贊將腳價銀二萬八千餘兩發交楊士璣收存爲辦公之用當經傳諭留京辦事王大臣提訊王廷贊據供原知此項冒開因勒爾謹設有應辦公事遂准其領去楊士璣並未分晰具報是實等語此案王廷贊始終捏飾踵弊效尤卽其派令屬員買辦物件一事向來藩臬不准進貢屢經降旨嚴飭更非如勒爾謹身任總督尙可藉口年節辦買土貢者可比是其婪索勒派種種情罪百喙難辭目下已居官犯勾到之期王廷贊係情實官犯著卽行處絞仍將此通諭中外知之○刑部等衙門奏江西信豐縣故民

蕭維富等創爲邪教轉相傳惑請依大逆例問擬得旨蕭維富廖秀林廖景澄著卽戮屍至廖景泮之父廖秀科一犯該部擬以緣坐固屬照例辦理但向來緣坐之犯無不加恩改爲監候以示罪人不孥之義況其父祖尤非兄弟子孫可比此案廖秀科訊非知情縱容著加恩免其治罪嗣後如有逆犯祖父應行緣坐者除訊明知情故縱仍照例問擬外其訊非知情者卽槩予省釋不必緣坐著爲令其餘應行緣坐之廖昌禮廖明富邱德化邱仁禮邱七元仔邱仁祿邱仁祖廖明光廖明貴俱著從寬改爲應斬監候秋後處決餘依議○辛亥諭甘肅提災冒賑一案飭法營私大小官員通同一氣爲從來未有之奇貪異事故當以重法治之非不知罪人不孥而此實非常之罪也除王亶望勒爾謹等分別明正典刑並將伊子革職發往伊犁以示懲儆至王廷贊蔣全迪楊士璣

程棟等覈其情罪本屬相同伊等之子俱應一律辦理除蔣全迪業經正法並無子嗣無庸置議外楊士璣贓私纍纍使其身尙在亦應正法已於蘭州被害倖免刑誅王廷贊見已處絞程棟陸瑋那禮善楊恩言鄭陳善見在審明贓款定擬斬決該七犯俱有子嗣其所捐官職無論是否係伊父在甘省任內出貲報捐俱著查明一體革去並著發往伊犁充當苦差以爲貪婪不法者戒○乙卯 上白避暑山莊回鑾○諭前已降旨停止甘肅陝西兩省收捐監生所有烏嚕木齊新疆捐著一併停止○丁巳諭甘省冒賑侵帑一案皆係王亶望爲藩司時倡率舞弊以致通省各屬視侵貪爲常事轉相效尤毫無顧忌見在程棟等二十二人之死悉由王亶望一人導之使陷於伏法卽與王亶望殺之何異覈其情罪雖寸磔不足蔽辜然而按律斬決無可加增實覺罪浮於法是以

前經降旨將伊子王裘等三人一併革職發往伊犁充當苦差其幼子八人俟年十二歲時再行陸續發往見據山西巡撫雅德奏將伊子監禁省城恐外省官官相護仍屬有名無實著雅德卽將未發王亶望諸子派委員小心解交刑部嚴行監禁俟及歲時由刑部陸續轉發並著刑部存記雖遇赦不得奏請援宥回籍如王亶望之子有在伊犁及中途脫逃等事卽於拏獲地方正法如此辦理於首惡情罪庶足相抵而大員之以侵貪作俑者亦共知炯戒○諭軍機大臣等刑部進呈廣東省秋審情實招冊內經部由緩決改入情實者蔡阿堅葉阿添區亞明三案均係執持金刃傷斃徒手之人情節較重與尋常鬪毆者不同已照例句決矣秋鞫大典所以明刑弼教務持情理之平俾無枉縱固不可有意從嚴若過事寬容尤非辟以止辟之意朕素知李湖之爲人嚴於待屬

負而寬於待百姓爲封疆大吏者正當如是存心朕亦未嘗不如
此至於百姓良善者固宜加意拊循而兇橫者尤不可不嚴行懲
創朕於秋審句到則用此意蓋除莠正以安良所當盡法處治按
律定擬俾奸匪聞風斂迹不至以身試法豈可徒博寬大之名轉
使兇徒漏網倖邀末減耶李湖此次部改僅止三案例不交部議
處但援擬失當殊屬有意從寬著傳旨申飭○戊午命撥奉天海
運餘米二萬石於天津靜海二縣備賑○江蘇沛縣河溢○辛酉
上還京師○丙寅諭據楊魁奏向來各國番商俱有一定口岸
呂宋商船歷皆趁洋赴廣從不至閩今有呂宋商民耶嗎叮等船
隻因遭風收泊廈港懇請就近貿易驗無傷損形迹恐係意存趨
避請嗣後該國商民來閩船隻並無損壞者一槩不准發賣貨物
等語楊魁此奏所見轉小呂宋商民遭遇風暴飄至廈門幸未傷

損亦情理所有若必遣回轉非體恤遠人之意如因閩海關輸稅定例與粵海關多寡不一該國商民意圖就輕避重何不咨查粵海關條例令其按照輸納該商民等趨避之弊不杜自絕嗣後該國商船有來閩者俱著照此辦理將此諭令知之○丁卯諭大學士公阿桂覆奏各省武職名糧裁添養廉挑補實額一摺據稱國家經費驟加不覺其多歲支則難爲繼此項經費歲增三百萬統計二十餘年卽須用七千萬兩請將武職議給養廉所扣兵餉除滇黔四川閩廣等省控制邊疆應查明增添兵額又陝甘兩省業添滿漢兵一萬五千餘名其餘腹裏省分均可毋庸挑補實額並請交軍機大臣會同該部查議等語國家經費原當量入爲出而足兵衛民爲萬年久遠計者又不得稍存靳惜之見阿桂見管三庫其所奏康熙雍正年間出入之數通盤畫算大臣籌國自應如

此但朕以泉貨本流通之物財散民聚聖訓甚明與其聚之於上
毋甯散之於下且在官多一分卽在民少一分顯而易見朕卽位
初年戶部銀庫計不過三千萬兩今四十餘年以來仰荷 上蒼
嘉佑年穀順成財賦充足中間普免天下地丁錢糧三次蠲免天
下漕糧兩次又各省偏災賑濟及新疆兩金川軍需所費何啻萬
萬而賦稅並未加增又非如漢武帝之用桑宏羊唐德宗之用裴
延齡以培克爲事而致府藏充盈也見在戶部庫銀尙存七千餘
萬兩朕又何肯稍爲靳惜乎且卽以歲支頓增三百萬兩計之至
乾隆六十年歸政之時所用亦不過四千餘萬加以每年歲入所
存其時庫藏較卽位時自必尙有盈餘又何必於此事鯁鯁過計
乎從前海望在戶部時不肯明言銀庫實數其意似恐外人聞知
朕彼時卽不以爲是國家惟正之供出入歲有常經原屬大公至

正又何必掩人耳目乎甚如明季金花聚斂乃至戶部請內帑亦不肯發則其鄙悖更可笑矣卽以內帑而論憶乾隆初年內務府大臣尙有奏撥部庫銀兩備用之事今則裁減浮費釐剔積弊不特無須奏撥且每歲將內務府庫銀命撥歸戶部者動以百萬計又何必以經費不敷歲出爲慮乎至於歲入項下惟米豆關稅一節初年曾經免稅原欲使市價日平乃行之日久並未平減殊不滿朕意後因安甯奏請復收經部議准允行至遇地方歉收穀貴之年原又降旨特行免米豆所過關之稅所以隨時調濟或使商賈多往亦救災區米貴之一法耳今阿桂旣籌畫及此但朕竟究以多添兵力不惜經費爲是在廷諸臣自必各有確見所有阿桂奏到原摺並朕此旨一併發鈔使中外咸知朕意並著大學士九卿科道詳悉妥議具奏

冬十月庚午朔諭昨據副都御史汪承霈條奏甘肅省監生一摺據稱自乾隆三十九年後甘省監生奉有停科之旨恐其中躁進之徒不安義命更易名字在部報捐鄉試或僥倖中式轉滋弊竇與其再犯而懲以冒混之條似不若先事而予以自新之路請以原名准其在部另行改捐給與執照免其停科並請勒限二年報捐如過期不捐雖扣滿三科亦不准其應試等語此等流弊事所必有所請在部另捐之處專爲杜絕頂冒以防弊混並非若吳王綸之迹類言利者可比是以交部詳議覆准允行蓋此等監生逐利熱中希圖省費報捐竟成壘斷卽槩予褫革原不爲過今照部議統限二年准以原名在部另捐入場已屬格外加恩但念該生等人數眾多從前在甘省上捐時俱係王亶望諸人引之犯法非盡該生等之過况前已出貲今槩令重捐其中寒畯未免志切觀

光而力有不逮情殊可憫著加恩將從前甘肅報捐監生者准其
呈明到部另照在部捐監之數繳足卽給與執照許其科考至定
限二年爲期稍近恐遠省邊陲一時未能徧曉及至遵例遠來而
限期已過未免向隅並著加恩再寬限三年統限五年爲率俾該
生等從容報納上進有階以副朕宥過推恩作養人材之至意餘
著仍照原議行將此通諭中外知之○辛未以扎勒翰金士松俱
爲內閣學士扎勒翰由太常寺卿
金士松由詹事遷○甲戌封榮親王永琪子縣億
爲多羅貝勒○乙亥以永慶爲陝西按察使由糧道遷○戊寅諭向例
大內阿哥封授王貝勒貝子公爵後俱由諸王貝勒等應得藍甲
內均勻攤出給與朕思若由王貝勒等應得藍甲內均勻攤出則
王貝勒等藍甲漸至缺少何以養贍所屬包衣諸人不無拮据而
阿哥等行輩亦與諸王貝勒漸遠著交宗人府嗣後阿哥內經朕

加恩封爲王貝勒貝子公者無庸由諸王貝勒等藍甲內均勻攤出給與著加恩照所封品級另給一分藍甲如此辦理封爵之阿哥等不分諸王貝勒藍甲而諸王貝勒養贍伊等所屬應得分例自然足用尤爲有益縣億昨旣封授貝勒著該衙門卽自縣億起照朕旨辦給○壬午諭前據舒赫德等條奏阿哥等之哈哈珠子內當差已過十年者請於補放侍衛護軍校驍騎校列名帶領引見補放朕思此事殊不合理哈哈珠子皆由勳舊家道殷實大員子弟內挑取伊等旣爲阿哥哈哈珠子並無別項苦差日後阿哥等封授王貝勒貝子公爵之時哈哈珠子等自爲該府護衛等官並無向隅此數年來每遇補放侍衛並各旗挑取護軍校驍騎校皆引舒赫德等條奏之例將哈哈珠子帶領引見諸大臣似此辦理或看阿哥情而不無瞻徇代託之處日久漸生弊端况哈哈珠

子補放侍衛護軍校後仍在哈珠子上行走既占其缺反致侍衛護軍校驍騎校等當差乏人殊非事體兩無益也見在挑取侍衛者頗多而補放護軍校驍騎校帶領哈珠子引見者更復不少此弊不可不亟爲釐剔除已經補放護軍校驍騎校毋庸查究外嗣後哈珠子如遇伊家原有世職佐領等官既係伊等應得之分著仍照前辦理其升補侍衛護軍校驍騎校之處著停止舒赫德等條奏之例永遠不必行並交總諳達八旗各屬一體遵照仍將此旨令阿哥等閱看○甲申諭元楊維禎著宋遼金正統辨大旨以元承宋統而排斥遼金其文不見本集惟陶宗儀輟耕錄載之今館臣編輯四庫全書謂其持論紕繆並輟耕錄內所載者亦與刪除且言隋先代周繼乃平陳未聞唐宋諸儒謂隋承陳不承周也此語似是而非蓋嘗論之春秋大一統之義尊王黜霸所

以立萬世之綱常使名正言順出於天命人心之正紫陽綱目義在正統是以始皇之二十六年秦始繼周漢始於高帝之五年而不始於秦降之歲三國不以魏吳之強奪漢統之正春秋之義然也楊維禎撰三史正統辨凡二千六百餘言義本春秋法宗綱目其欲以元繼南宋爲正統而不及遼金其論頗正不得謂之紕繆夫維禎身爲元臣入明雖不仕而應明太祖之召且上鐃歌鼓吹曲頌美新朝非刺故國幾於劇秦美新其進退無據較之錢謙益託言不忘故君者鄙倍尤甚向屢於詩文中斥之而維禎正統之辨則不可以人廢言也夫正統者繼前統受新命也東晉以後宋齊梁陳雖江左偏安而所承者晉之正統其時若拓跋魏氏地大勢強北齊北周繼之亦較南朝爲盛而中華正統不得不屬之宋齊梁陳者其所承之統正也至隋則平陳以後混一區宇始得爲

大一統卽唐之末季藩鎮擾亂自朱溫以訖郭威等或起自寇竊或身爲叛臣五十餘年之間更易數姓甚且稱臣稱姪於契丹然中國統緒相承宋以前亦不得不以正統屬之梁唐晉漢周也至宋南渡後偏處臨安其時遼金元相繼起於北邊奄有河北宋雖稱姪於金而其所承者究仍北宋之正統遼金不得攘而有之至元世祖平宋始有宋統當絕我統當續之語則統緒之正元世祖已知之稔矣我皇祖御批通鑑及朕向所批通鑑輯覽俱以此論定蓋春秋大義綱目大法實萬世不易之準我朝爲明復仇討賊定鼎中原合一海宇爲自古得天下最正然朕猶於通鑑輯覽內存福王建國之號一年使其能保守南都未嘗不可如南宋之承統縣延不絕而奈其當陽九之運天弗與人弗歸自覆其宗社也此實大公至正天下萬世可以共見共守之論然館臣之刪楊

維禎正統辨者其意蓋以金爲滿洲欲令承遼之統故曲爲之說耳不知遼金皆起自北方本無所承統非若宋元之相承遞及爲中華之主也若以此立論轉覺狹小天下萬世必有起而議之者是不可以不辨朕以爲不但輟耕錄中所載楊維禎之正統辨不必刪除卽楊維禎文集內亦當補錄是篇並將此論各載卷首以昭天命人心之正以存春秋綱目之義特諭○賜劉雙等四十五人武進士及第出身有差○乙酉諭四庫全書館進呈書內有宋葉隆禮奉敕所撰契丹國志其說採摘通鑑長編及諸說部書按年臚載鈔撮成文中間體例混淆書法謁舛不一而足如書旣名契丹國志自應以遼爲主乃卷首年譜旣標太祖太宗等帝而事實內或稱遼帝或稱國主豈非自亂其例又是書旣奉南宋孝宗敕撰而評斷引宋臣胡安國語稱爲胡文定公實失君臣之體甚

至大書遼帝紀元於上而以宋祖建隆等年號分注於下尤爲紕繆夫梁唐晉漢周僭亂之主享國日淺且或稱臣稱兒稱孫於遼分注紀元尙可若北宋則中原一統豈能以春秋分國之例槩子分注於北遼之下又引胡安國論斷以劫迫其父開門納晉軍之楊承勳訓變而不失其正時承勳同父被晉圍懼禍及身乃劫其父致被晉戮而已受晉爵賞夫大義滅親父可施之子子不可施之父父卽背叛子惟一死以答君親豈有蔑倫背義尙得謂之變而不失其正此乃胡安國華夷之見芥蒂於心右逆子而亂天經誠所謂胡說也其他乖謬種種難以枚舉朕詳加披覽經指駁者數十條館臣乃請撤出此部書朕以春秋天子之事是非萬世之公昨曾著正統辨論斷甚明今契丹國志既有成書紀載當存其舊惟體例書法謬於綱目大義有乖者不可不加釐正著總纂

紀昀等詳加校勘依例改纂其志中之事蹟如祭用白馬灰牛糞中枯骨變形視事及戴野猪頭披皮之事雖迹涉荒誕然與詩書所載簡狄吞卵姜嫄履武復何以異蓋神道設教以溯發祥古今胥然義正如此又何必信遠而疑近乎其餘遼帝過舉如母后擅權諸事足爲後世鑑戒者仍據志直書一字不可易該總裁等覆閱進呈候朕親定錄入四庫全書並將此旨書於簡端以昭網常名教大公至正之義特諭○己丑以葉佩蓀爲湖南布政使由山東按察使○庚寅以梁肯堂爲山東按察使由直隸清河道遷○甲午定試用佐貳不准委署州縣例○丙申諭歷代名臣奏疏向有流傳選刻之本四庫全書內亦經館臣編次進呈其中危言讜論關係前代得失者固可援爲法戒因思勝國去今尤近三百年中盡臣傑士風節偉著者實不乏人迹其規陳治亂抗疏批鱗當亦不亞漢唐

宋元諸臣而奏疏未有專本使當年繩愆糾謬忠君愛國之忱後世無由想見誠闕典也卽或其人品誼未醇而其言一事陳一弊切中利病有裨時政者亦不可以人廢言至神宗以後諸臣奏疏內有因遼濬用兵涉及本朝之處彼時主閭政昏太阿倒置閭人竊柄權倖滿朝以致舉錯失當賞罰不明其君綴旒於上竟置國是若罔聞遂至流寇四起兵潰餉絕種種秕政指不勝數若楊漣左光斗熊廷弼諸人或折衝疆場或正色立朝俱能慷慨建議剴切敷陳設明之君果能採而用之猶不至敗亡若是之亟其事距今百十餘年殷鑒不遠尤當引爲炯戒則諸人奏疏不可不急爲輯錄也除明史本傳外所有入四庫全書諸人文集均當廣爲蒐採裒集成編卽有違礙字句止須略爲節潤仍將全文錄入不可刪改此事關繫明季之所以亡與我朝之所以興敬怠之分天人

之際不可不深思遠慮觸目儆心著派諸皇子同總師傅蔡新等
爲總裁其皇孫皇曾孫之師傅翰林等卽著爲纂修校錄陸續進
呈候朕親裁書成後卽交武英殿刊刻仍鈔入四庫全書將此旨
冠於簡端所有前次紀昀等選出神宗以後各奏疏卽著歸入此
書按其朝代一體編纂特諭○諭向來宗室人員旣不分用各部
院又不便簡用外省道府其宗人府理事等官保送御史止有二
缺轉科後遺缺仍用八旗滿洲人員升途未免稍狹見在宗室舊
衍其中不少可用之才所有宗室御史著於原定二缺之外俟有
滿洲御史缺出時再行添用宗室二員連前四員作爲額缺如有
遷轉科員者御史員缺仍以宗室人員補放至陵寢辦事衙門
司員俱屬宗室貝勒公等管轄與部院司員有間嗣後遇有陵
寢辦事衙門司員亦可酌改宗室數員其如何分別補用應改若

干員缺之處著宗人府會同該部詳悉妥議具奏尋奏宗室御史
向止二缺今遵旨再添二缺請嗣後遇有滿洲御史缺出吏部行
知宗人府由宗室應升人員內揀選引見補放二員至 陵寢司
員計三十二缺請照御史二十八缺用宗室四員之數酌改五缺
將 東陵郎中一員外郎一主事一 泰陵員外郎主事各一爲
宗室額缺見在郎中由宗人府於副理事官內揀選升用員外郎
於經歷主事內揀選升用主事於兩翼宗學總管副管宗人府筆
帖式內揀選升用俟陸續缺出吏部行文宗人府分別辦理至此
次補放後再遇 陵寢宗室郎中缺出以員外郎升補員外郎缺
出卽以主事升補主事缺出卽於兩翼宗學總管副管宗人府筆
帖式內揀選補放其郎中員外郎六年期滿由總管 陵寢貝子
公等出具考語咨宗人府帶領引見以京缺理事官調補或俟有

陵寢總管缺出該管員子公等出具考語送京帶領引見升用從之○丁酉諭劉天成奏請嚴浮費之禁以裕民生一摺其意在於去奢崇儉返樸還淳言之亦覺動聽而行之實有所難如摺內所稱居樓園館一日輒耗數日之需浪子酒徒一人每兼數人之用甚至齊民婦女宦家奴隸僭肆奢華妄誇文繡等語未嘗非真實情事但此等風俗積漸使然國家承平百有餘年生齒日繁京師爲萬方輻湊之地各省省治與夫蘇杭漢口香山大馬頭之類百姓耳濡目染非鄉隅偏僻可比由儉入奢勢使然也若如所言卽京城言之朕何難飭令步軍統領衙門及巡城御史轉飭司坊各官將茶坊酒肆一切花費錢財之地盡行封閉飭禁其有僭越定制妄事侈靡者訪拏究處卽外省各市鎮各處亦可俾各督撫實力查禁當此政治嚴肅之時何慮不令行禁止然朕旣不能道

德齊禮以成丕變之休卽不得已而齊以政刑亦當務其大者儻以問問浮費之故輒繩以國法輕則不足示懲不過陽奉陰違重則未免已甚朕不爲已甚也是使民未蒙崇儉之益而先受滋擾之紛亦豈政體所宜况每歲秋審謀故殺人犯已不勝誅豈能將侈肆越禮之人復一一繩以三尺乎此朕非不能辦實不忍辦亦不必辦也且其事亦多有不便於民者卽以官員服色而論從前康熙雍正及乾隆初年開屢經臣工條奏然行之究無實效如繡蟒服用爭購居奇轉滋耗費自不若任其穿用之爲便也夫湊樸難復古道不行如三代井田之法豈非王政之善當時所謂八家同養公田公事畢然後敢治私事此亦宜於古而不宜於今近世人情日薄誰肯先公後私卽均田亦稱善政窮儒往往希此以爲

必應行而在今日亦斷屬難行無論奪富以益貧萬萬不可即使
哀多益寡而富人之有餘亦終不能補貧人之不足勢必致貧者
未能富而富者先貧亦何賴此調劑爲耶卽朕宵旰勤求未嘗不
欲民風敦樸戶有蓋藏而習俗日趨於華靡殆非條教號令所能
飭禁譬如江河之向東誰能障之使西流耶亦惟崇儉尙樸願內
外大小臣工不可不存此心以期漸就返古還淳俾四民知所則
倣此我君臣所當知愧知懍而已劉天成此奏若以爲嘉奏疏則
可若以爲目今治世之良法則未然著發鈔並將此通諭中外知
之○諭軍機大臣等向例甘肅總督於每年冬季有哈密瓜皮張
等貢呈進因係該處土產是以照例准收但本年甘省冒賑案內
各犯有爲總督勒爾謹代買皮張之語該犯等爲勒爾謹代買皮
張斷非俱是呈進之物但既有此貢轉使侵貪各員得以藉口嗣

後著停其呈進至哈密本處既有貢瓜足備賞用所有甘省呈進金塔寺之瓜亦著一併停止呈進將此隨奏事之便諭令知之○戊戌定滿洲駐防官兵年老退休回京就養例

十一月己亥朔諭軍機大臣等前因川省沙金鳳呈控沙金龍霸產一案該省應行解京之犯遲至數月尙未解到總緣文綬平日漫不經心以致各屬玩誤因諭福康安查明實力整頓茲據福康安查明犯證人等起解並遲滯緣由具奏可見文綬在川督任內因循貽誤諸事廢弛罪無可追文綬前於囑匪一案辦理謬誤未經從重治罪僅令前往伊犁效力贖罪已屬寬典今又查明文綬於解京質審要犯復玩愒若此其種種錯謬試令伊捫心自問其伊犁效力遂足蔽其辜耶著傳諭李侍堯如文綬此時行抵甘省卽著於沿途將此旨發交閱看令其自行議罪據實代爲具奏若

文綬已過甘肅卽著將此旨並福康安原摺寄交伊犁將軍伊勒圖令其遵照詢問覆奏將此由五百里傳諭李侍堯知之福康安奏到原摺並著鈔寄○庚子諭工部尙書周元理勤慎供職宣力有年茲以老病乞休著准其回籍調理並加恩賞給太子太傅銜以示優眷所有工部尙書員缺著羅源漢補授劉墉著補授都察院左都御史仍暫行兼管湖南巡撫事候朕另降諭旨○甲辰諭昨閱四庫館進呈書有朱存孝編輯回文類聚補遺一種內載美人八詠詩詞意蝶狎有乖雅正夫詩以溫柔敦厚爲教孔子不刪鄭衛所以示刺示戒也故三百篇之旨一言蔽以無邪卽美人香草以喻君子亦當原本風雅歸諸麗則謂託興遙深語在此而意在彼也自玉臺新詠以後唐人韓偓輩務作綺麗之詞號爲香奩體漸入浮靡尤而效之者詩格更爲卑下今美人八詠內所列麗

華髮等詩毫無寄託輒取俗傳鄙褻之語曲爲描寫無論詩固不
工卽其編造題目不知何所證據朕輯四庫全書當採詩文之有
關世道人心者若此等詩句豈可以體近香奩樂行採錄所有美
人八詠詩著卽行撤出至此外各種詩集內有似此者亦著該總
裁督同總校等詳細檢查一併撤出以示朕釐正詩體崇尚雅醇
之至意○乙巳命撥兩淮鹽課銀五十萬兩並截留漕糧五萬石
於徐州府屬備賑○丙午諭劉墉已補授左都御史其湖南巡撫
員缺李世傑將屆服滿卽著前往署理俟服闋再行實授劉墉俟
李世傑接任後卽行來京供職○丁巳諭軍機大臣等本日陳輝
祖奏到查抄甘省侵冒案內陸瑋等各員家產單內開閔鵬元名
下銀三兩所辦殊有欺飾無論閔鵬元在甘肅知縣同知任內侵
蝕帑項盈千累萬私肥囊橐計其家貲必不止此况伊兄閔鵠元

久任巡撫所得養廉優厚亦豈肯令其弟貧乏至此卽如陳巖祖
係陳輝祖胞弟假令其名下存銀亦不過止有數金爲之兄者竟
能坐視乎此必係承辦查抄委員任其欺隱隨意開報陳輝祖亦
並不細心查閱遽爾入告獨不思此非情理之所有乎朕於甘肅
查抄各員一案曾降旨令各督撫不必過爲苛刻今閱鵠元之罪
並未波及其兄已屬施恩格外若任其將閱鵠元應抄財物混入
伊兄閱鵠元名下以爲隱匿寄頓之地朕亦不受其欺也若眾人
於閱鵠元有意徇蔽是速閱鵠元之死矣陳輝祖豈不意計及此
著傳諭令其明白回奏○中保卒以復興爲左都御史留保住爲
理藩院右侍郎由副都統遷○調永慶爲福建按察使秦承恩爲陝西
按察使○調李慶棻爲江蘇按察使塔琦爲湖南按察使○戊午
以汪新爲湖北按察使由甘肅鹽道遷○庚申諭軍機大臣等昨據陳輝

祖奏查抄閔鵠元原籍財產單內止有銀三兩竟成笑話明係陳
輝祖查辦時任聽委員欺隱隨意開報業經降旨詢問令其明白
回奏矣閔鵠元係閔鶚元胞弟如果貧乏不能自存閔鶚元豈有
坐視之理且閔本日李侍堯奏應革各犯子弟職監單內閔鵠
元之子閔思恆捐納監生豈有其家止存銀三兩而復有餘財爲
伊子捐監之理甘省冒賑一案久經發覺閔鵠元又係案內之人
閔風寄頓豫爲藏匿地步閔鶚元在江蘇離伊原籍甚近亦豈無
見聞乃任其私自隱藏希圖事後安享實爲利令智昏此等蒙混
欺飾伎倆或試爲於漢獻帝明萬歷類之主尙可欲於朕前嘗試
閔鶚元視朕爲何如主耶著傳諭嚴行申飭仍令其明白回奏將
此由五百里諭令知之○癸亥諭朕恭閱 聖祖實錄從前征討
三藩時效用疆場功績最著者如陳福張勇趙良棟王進寶孫思

克等忠貞素篤勇略兼優於戎務邊防皆能殫心盡力疊膺懋賞
恩渥有加今歷年久遠伊等子孫如陳福之孫陳大用見已擢任
正定總兵尙可望其及時效用克繼家聲至張勇等諸人其子若
孫見在承襲世爵及見任職官並其餘支派子孫著交該部旗查
明具奏候朕酌量加恩以示眷念舊勳賞延於世之至意○戊辰
命撥兩淮鹽課銀五十萬兩修沛縣城垣並安輯移徙戶口○袁
守侗丁憂以鄭大進爲直隸總督

山湖北
巡撫遷

十二月己巳朔調姚成烈爲湖北巡撫以朱椿爲廣西巡撫富躬

爲廣西布政使

由按察
使遷

○庚午召梁敦書來京以永慶爲湖北布

政使伊星阿爲福建按察使

由雲南巡
東道遷

○以姚梁爲廣西按察使

由四川
東道遷

○壬申諭前據陳輝祖查抄閔鵬元原籍貲財其家止

存銀三兩殊堪駭異無論閔鵬元在甘肅同知知縣任內侵蝕帑

項盈千累萬其運回家貲必不止此卽閔鶚元久任巡撫其所得養廉優厚豈忍令其胞弟貧乏至此非陳輝祖查辦時任聽委員欺隱隨意開報卽閔鶚元之家屬聞風豫爲奇頓閔鶚元在江蘇離伊原籍甚近豈無見聞乃任其私自隱藏希圖事後安享實爲蒙混欺飾曾降旨嚴行申飭並令其明白回奏茲據閔鶚元覆奏請將伊名下原籍任所財產一併恭繳入官並請革職交部治罪等語何必爲此不衷過甚之辭乎甘肅自王亶望爲藩司首先作俑與通省屬員捏災冒賑聯爲一氣其案內各人犯見已審明侵蝕銀數多寡按律問擬其查抄各犯家產因此事發覺已久各犯家屬諸弊叢生但此等變得之財理無久享亦不必過爲搜求業經明降諭旨則隱匿寄藏財產者亦不獨閔鶚元一人且以全案而論有王亶望之喪心侵冒無怪有閔鶚元之事後藏匿陳輝祖

閔鵠元之互相欺隱轉不直一喙朕嘗謂不爲已甚去已甚正謂此也然不得不明揭伊等之私者恐伊等遂謂朕易欺也封疆大臣理宜公忠體國實心任事不得稍存欺飾今閔鵠元於伊弟胤法營私諸事旣不能管教於前及發覺查抄又任其隱匿侵欺於後卽伊具摺自陳亦難以解免試令清夜捫心其亦知愧知懼否耶其所請革職治罪及呈繳家產之處朕究不爲已甚均著加恩寬免閔鵠元原摺著發鈔並將此通諭中外知之○癸酉諭本日據閔鵠元覆奏伊弟閔鵠元在甘肅侵冒帑銀及餽送王亶望銀兩之事知而不舉各緣由一摺其措詞始終掩飾枝梧並未明白回奏已於摺內詳悉批示矣王亶望在甘肅藩司任內與蔣全迪等通同一氣侵帑婪贓種種不法實爲從來未有之奇貪異事內外大臣無人不知竟無一人舉發陳奏朕實爲之寒心至陳輝祖

閔鶚元則俱有胞弟爲王亶望屬員其平日家信往來必有言及王亶望侵貪及上下通同作弊之事陳輝祖閔鶚元當時恐徑行舉發必致株連其弟因而隱忍不言徇私廢公已屬昧良然猶或情事所有尙可曲爲之貸今事已全行敗露朕復屢經降旨嚴切詢問閔鶚元覆奏之摺乃止稱不能管教及未能先事舉發等語而於當時有無確切家信及知情不舉之處始終掩護不肯奏出實情此等居心行事豈能於朕前巧爲嘗試著再傳諭陳輝祖閔鶚元令其各將伊弟在甘省與王亶望等通同作弊之事有無往來家信伊二人知而不舉之處據實具奏儻伊等不知朕恩仍復如前巧言搪塞則是有意欺罔不但將伊等革職交刑部朕必親自廷鞫伊等自揣尙能始終掩飾乎試思督撫中豈少伊二人竟無人可用之理朕臨御四十餘年辦理庶務一秉大公至正無

諭督撫大吏卽小民亦不肯屈抑一人若聽閔鶚元之巧爲文語支飾置而不問天下無識之徒轉以朕爲屈抑伊等則朕不肯受過也不爲已甚朕之宿志若伊等激朕以爲已甚則朕亦非不能爲已甚者將此傳諭中外咸知朕意並令陳輝祖閔鶚元各據天良據實明白覆奏所有閔鶚元原摺一併發鈔○諭前據圖思義等查奏參革哈密通判經方虧短庫貯銀至十五萬餘兩業經降旨將經方解京嚴審並令李侍堯等詳查如何虧短花費緣由據實具奏今據李侍堯奏查經方在哈密通判任內節次由道庫司庫及接收上任交代銀共四十七萬九千餘兩其作何支銷之處緣口外各廳州縣一切動用銀兩自四十二年經烏魯木齊都統索諾木策凌奏准由該處徑行報銷所有經方任內支收細數總督衙門無從稽覈其如何花費哈密距省較遠一時未能悉其底

裏見在另行訪查具奏等語口外各廳州縣經管庫項銀兩其支收數目自應隨時詳報總督方足以資稽覈乃索諾木策凌奏由該處徑行報銷以致總督衙門無從查考經管之員得以任意支銷侵虧鉅萬實由索諾木策凌辦理不善所致著交部嚴加議處嗣後口外地方一切請領接收銀兩及作何動用之處並著會同該督查覈詳確報銷著爲令該部知道○丁丑諭廣東巡撫李湖老成練達才守兼優簡任巡撫以來辦理地方事務實心實力正資倚毗茲聞溘逝深爲軫惜著加恩晉贈尙書銜其任內降革處分並予開復所有應得卹典著該部察例具奏尋予祭葬諡恭毅○調雅德爲廣東巡撫以譚尙忠爲山西巡撫調國棟爲山西布政使以盛佳爲浙江布政使由杭嘉湖道遷○己卯諭本日據阿桂李奉翰韓鐸覆奏嵇璜前奏令黃河北流仍歸山東故道其事必不可

行各摺已批交該部知道矣此事前據嵇璜面奏朕揣度形勢早
知其事勢難行無論黃河南徙自北宋以來至今已閱數百年卽
以見在青龍岡漫口情形而論其泛溢之水由趙王河歸大清河
入海者止有二分其由南陽昭陽等湖匯流南下歸入正河者仍
有八分豈能力挽全河之水使之北注此事勢之顯而易見者從
前孫嘉淦亦曾有此議究以形勢隔礙難行其說遂寢今嵇璜復
有此奏是以降旨詢問阿桂等令各就所見據實覆奏茲據阿桂
等覆奏俱稱揣時度勢斷不能行其詞若合一轍且稱始而南流
八分者繼則全歸南注地形北高南低水性就下惟應補偏救弊
以復其安流順軌之常山東地高於江南若導河北注揆之地形
之高下水性之順逆斷無是理等語諒阿桂等必揣合朕意故爲
此奏但嵇璜尙素爲熟悉河務之人其前奏使河流仍歸山東故

道之語亦必中有所見即使其事難行而其言爲要工起見究屬因公且治河之策本應集思廣益正不妨博採周諮以期詢謀僉同折衷至當著大學士九卿科道等再行悉心妥協會議具奏○辛巳諭向來軍營打仗受傷官兵定例分爲五等凡受傷時卽有例賞其因傷身故者頭等傷以半年爲限二三等傷以七十日爲限四五等傷以四十日爲限限內因傷亡故者仍照陣亡例給與卹典恩至遲也但向例頭等傷與二三四五等傷所定期限未免懸殊其限外因傷亡故者卽不得邀陣亡恩卹之例情殊可憫於軫卹傷亡之道尙未周至且受傷雖有輕重不同其略帶浮傷者原無庸列入等第其實在打仗出力衝冒槍礮受傷者分作一二三等已足以昭詳覈若多分等差過爲區別轉啓高下其手之弊所有官兵受傷等第向立例限並限外身故者應如何賞卹之處

著交該部另行詳悉妥議具奏尋議嗣後官兵頭等傷仍照舊例
予限半年傷列二等者請予限五箇月三等者予限四箇月限內
因傷亡故仍照陣亡例議卹其略帶浮傷者令該管大臣隨時獎
賞將四五等傷名目槩行刪除至打仗受傷限外身故三品以下
官弁列頭二等傷者廕子弟一人以七品官用列三等傷者廕子
弟一人以八品官用其一二品大員廕子弟一人以六品官用若
無嫡親子弟堪廕或有子弟而官職均在應廕品級上者請照伊
等受傷等第照例賞卹銀兩毋庸議給官職年未及歲者歲給半
俸俟當差時再行支食全俸其應廕之人未仕而故准其補廕至
打仗受傷限外身故兵丁其眷口各旗營例有養贍錢糧無庸另
議外查向例獎賞受傷兵丁旗兵頭等傷賞銀五十兩二等傷賞
銀四十兩三等傷賞銀三十兩綠營兵頭等傷賞銀三十兩二等

傷賞銀二十五兩三等傷賞銀二十兩限外亡故應仍照數賞給
其呈報限內限外傷亡之處俱令該管各官結報查覈從之○癸
未諭四庫全書館進呈書內有蕭雲從畫離騷圖一冊蓋踵李公
麟九歌圖意而分章摘句續爲全圖博考前經義存規鑒頗合古
人左圖右書之意但今書中所存各圖缺略不全著南書房翰林
重加訂正其應補者酌定彙本令門應兆補行繪畫以成完璧書
成卽錄此旨冠於簡端○甲申以毓奇爲內閣學士由給事中遷○戊
子大學士等議覆嵇璜奏請使黃河仍復山東故道其事難行惟
青龍岡此次漫口合而復開實因引河形勢窄狹宜洩不暢所致
見據大學士公阿桂奏請將孔家莊等處引河展寬應飭令速卽
派員趕挑至下游宣洩不暢上游各處隄工難保穩固應救下河
東江南河道總督查勘遇有淤阻之處卽行設法疏通再臣胡季

堂竊有請者黃河南北兩隄相距二三十里及數十里不等隄內均屬河身不便少有壅塞近日隄內村莊甚多並皆耕種麥苗有礙河身應飭令遷居隄外得旨依議諭軍機大臣等本日據大學士九卿等會議黃河水勢情形一摺已依議行矣內胡季堂所稱河灘地畝盡皆耕種麥苗並多居民村落一遇水發之時勢必築圍打壩填塞日多是河身多一村莊卽水勢少一分容納請敕下河南山東江南各督撫確查令其拆去遷居隄外等語所見甚是河灘地畝居民日就耕種漸成村落一遇水勢增長自必築壩壅壩填塞河身此弊由來已非一日最宜嚴禁從前朕閱永定河隄卽見有民人在彼耕種居住者特諭方觀承令其嗣後嚴行禁止勿使增益彼時聞南河亦有此弊曾於閱永定河隄示方觀承詩內再三諄訓今河南山東等省聚居河灘者村莊稠密更非永定

河可比若聽其住居墾種於河道甚有關繫著傳諭薩載等卽行確加履勘其隄外地處高阜無礙河身者自不妨聽其照常居住耕種若隄內地方不便占居填塞有礙水道所有村莊房舍該督撫等務須嚴切曉諭令其陸續遷移徙居隄外俾河身空闊足資容納仍須遴委幹員不動聲色妥爲經理使遷徙貧民毋致擾動失業方爲盡善著將此傳諭薩載等並諭阿桂英廉知之所有大學士九卿等會議原摺俱著鈔寄閱看○庚寅諭前據御史錢澧參奏畢沅署陝甘督篆時於該省冒賑諸弊瞻徇畏避請敕部將畢沅比照捏結各員治罪一摺卽諭畢沅明白回奏並令大學士九卿科道議奏據大學士等請將畢沅革職發往新疆效力贖罪已降旨俟畢沅覆奏到日再降諭旨矣今據畢沅奏伊於四十一年署理督篆時因金川凱旋經手軍需事件叢集迅速回陝於該

省監糧情弊曾經查問屬員枝梧隱飾急切不能得其要領則是畢沅已大槩知有弊矣何以不奏至四十四年署篆又以伊赴西甯口外辦理事件在省爲日無多未能覺察舉劾今並請交部嚴加治罪等語畢沅兩經署理督篆於王亶望等折捐冒賑上下通同舞弊等事適值其時乃不卽據實參奏及至降旨詢問又以兩署總督爲時甚暫辦理軍需事件繁多託詞卸責所奏實屬支飾試思革職交部亦不過仍如大學士九卿等所議耳但王亶望等句通侵冒一案內外大臣皆知而不舉朕亦不肯獨歸罪畢沅一人且見在督撫乏員畢沅著從寬照李侍堯富勒渾之例降爲三品頂帶仍留陝西巡撫之任所有應得職俸及養廉永行停止以示懲儆儻因停其廉俸或需索屬員以爲自肥之計一經查出朕必重治其罪不能再爲寬貸也該部知道○辛卯調譚尙忠爲安

徽巡撫農起爲山西巡撫○調劉綎爲山西布政使國棟爲安徽布政使○丁酉諭軍機大臣等四川土司沙金龍弟兄爭控一案始於乾隆四年距今四十餘年延閣未結該會理州知州徐士勳於土司搶劫牛羊穀石之案復延玩二年不辦經朕降旨將案犯解京令軍機大臣會同刑部反復研鞫訊得實情按律定擬此等土司遠居邊徼遇有爭控之案地方官自應卽時秉公審斷迅速辦理乃此案始於乾隆四年歷任總督並不飭屬早行審結以至該土司之弟姪屢次赴京具控展轉繫逮可見地方官平日竟不以事爲事至該州徐士勳於搶劫大案延閣不辦在總督文綬任內該省諸事廢弛上下因循延玩貽誤地方不小土司以私仇互控地方官置之不問安知不釀成事端從前金川沃克什之事可以爲鑒何歷任總督竟無一人計慮及此至各省苗疆及番夷地

方離省較遠如有訐訟之案俱宜立時審斷著傳諭各督撫嗣後務宜嚴飭所屬留心體訪一有此等控案一面奏聞一面秉公辦理毋再如川省此案延玩日久直待解京審訊也○是歲朝鮮安南暹羅南掌來貢○會計天下民穀數各省通共大小男婦二萬七千九百八十一萬六千七十名口各省通共存倉米穀四千二百一十一萬九千八百四十九石二斗八升二合八勺